

Nossa patria il Grischun – nossa finamira Berna

La Partida liberaldemocratica dal Grischun ha preschentà ses candidats e ses program electoral

DA MARTIN CABALZAR

Martin Schmid en il cussegl dals chantuns

Cussegl dals chantuns *Martin Schmid* che sesa gia dapi otg onns en il parlament federal di ch'el haja a Berna ina vasta rait da contacts sur las partidas or e ch'el disponia sco anteriur cusseglie governativ dal Grischun d'ina vasta experienza politica e ch'el enconuschia fitg bain ils bassegns e las sfidas da noss chantun muntagnard, da sias regiuns e da sia populaiziun.

Sco parsura e commember da pliras impurtantas cumissiums haja el pudì far valair las posiziuns grischunas cunzunt en connex cun la forza idraulica e tar la tractaziun dal project cumbinà da taglia ed AVS che saja la finala vegnì sancziunà dal suveran cun gronda maorità. El haja era pudì prender influenza sin la lescha da chatscha, sin la politica agrara ed a favur dal turissem che sajan spartas fitg impurtantas per il chantun Grischun. Grazia a l'excellenta collavuraziun cun ses collega *Stefan Engler* (pcd) hajan ins cuntanschì bun sustegn per la finanziaziun da las viafiers e da las vias.

Per ils proxims quatter onns veglia el s'engaschar per segirar las pussaivladads da svilup en tut las regiuns da la Svizra, per uschia segirar nossa bainstanza, stabilisar las relaziuns cun l'Europa e sanar noss sistem da rentas senza stuair engrevgiar memia zunt la generaziun giuvna. Impurtant saja plinavant da crear favuravlas cundiziuns da rom per turissem, agricultura, industria e sectur da servetschs.

I giaja en quest connex era per demonstrar che las regiuns alpinas hajan autras sfidas e prioritads ch'ils centers metropolitans da Genevra u Turitg.

■ «Nossa patria è il Grischun, nossa finamira è Berna.» Quai è il slogan electoral che candidatas e candidats da la Partida liberala dal Grischun han preschentà ier a la staziun da Cuira. Sper la reelecziun onurifica da *Martin Schmid* en il cussegl dals chantuns vulan ils liberals grischuns era (re)acquistar in sez en il cussegl nazional. «Questa finamira vul la pld grischuna cuntanscher cun ina glista principala attractiva, cun duas glistas da support e cun ina glista dals giuvens liberals», ha ditg il parsura da partida *Bruno W. Claus* avant las medias. La glista principala reuneschia tschintg personalitads enconuscentas en tut il Grischun. Sin l'emprim plaz figurescha l'antierur president da partida e president dal cussegl grond *Michael Pfäffli* or da l'Engiadina. Cun la giuvna deputada e scheffa da fraziun *Vera Stiffler* da Cuira figurescha ina dunna engaschada sco cussegladra da marketing sin plaz 2. Cun *Andreas Züllig* da Lai, il parsura da *Hotelleriesuisse* hajan ins pudì gudagnar in interpretider innovativ che lavuria cun success en la sparta turistica. L'italianità saja represchentada tras la presidenta communal bregagliotta *Anna Giacometti* e *Martin Bundi*, oriund da l'Engiadina e sesent a Trin, represchentia la generaziun dals giuvens interpretiders. El cumbinescha sia professiun cun la funcziun da chasarin. Sustegnida vegn la glista principala tras las trais glistas da support «mansteranza» e «politica communal» e «pld dals giuvens». La pld fetschia pia tut il pussaivel da mobilisar ses electorat cun ina vasta schelta da 20 candidatas e candidats, sincerescha il manader da la campagna *Thomas Hobi*.



Preschentaziun dals candidats e dal program da la pld grischuna ier a Cuira: Il parsura *Bruno W. Claus*, cusseglie dals chantuns *Martin Schmid*, *Michael Pfäffli*, *Vera Stiffler*, *Andreas Züllig*, *Anna Giacometti* e *Martin Bundi* (da san.).

FOTO O. AEBLI-ITEM

Reacquistar ina sutga en il cussegl nazional

Il candidat *Michael Pfäffli* punctuescha che la Svizra d'ora in contract fair tranter las generaziuns, in contract che tegnia quint tant da la midada demografica sco da las aspectativas da vita creschentas. In auzament da la vegliadetgna da pensiu na saja per el nagin tabu. Nossa societad d'ora la solidaritad vivida e saja vinavant dependenta da la lavur voluntaria. Per segirar nossa bainstanza a moda durabla d'ora vinavant cundiziuns da rom attractivas per l'economia, mo tantas leschas sco necessari, bunas cundiziuns fiscalas ed infrastrukturas efficientas, punctuescha *Pfäffli*. Nus stoppian avair la pussaivladad da nizzegiar nossas cuntradas e nossas resursas natiralas a moda efficienta e persistenta, promover la digitalisaziun sco schanza cunzunt era per valladas periferas e regiuns turisticas.

Vera Stiffler, sezza mamma da trais uffants, punctuescha la necessitad da promover la cumpatibilitad da famiglia e professiun, da metter a disposiziun modernas purschidas dal traffic public e da far ina politica dal clima persistenta. Personalmain s'engaschia ella era per ils interess da la dunna, accentuand en il medem mument la necessitad d'ina meglra represchentanza da las dunnas en ils gremis strategics ed en il cader superiur da las interpresas. La taxaziun fiscal individuala fissia in'impurtanta mesura per cumbatter la mancanza da personal qualifitgà ed effectuassia ch'il martgà da lavur fiss pli attractiv per las dunnas. *Stiffler* vul finalmain realisar in «congedi da geniturs» enstagl da discutir davart in congedi da paternitad per ils babs che saja in'idea antiquada.

Sco parsura da *Hotelleriesuisse* dispona l'hotelier *Andreas Züllig* d'ina vasta rait da

contacts sin plaun nazional ed en questa funcziun saja el era s'engaschà per far punts tranter ils partenaris socials sur ils cunfins da sia partida or. Sco cusseglie nazional vegnessia el a s'engaschar cunzunt per il turissem en las regiuns muntagnardas e per in'conomia che serva al Grischun. Enstagl da subvenziuns perfereschia el ina promozion efficienta dal lieu. Fitg impurtanta saja la furmazion da giarsunadi orientada a la pratica, academichers na sajan a priori betg buns manders d'interpresa. El vegnessia er a s'engaschar a Berna per dapli libertads d'interpretider, per ina politica dal clima verdaivla e per cuntradas intactas.

La presidenta communal bregagliotta *Anna Giacometti* ch'è daventada enconuscenta sco managera da las bovass da Bondo vul represchentar l'italianità e las dunnas en il cumbat electoral. Sias prioritads politicas èn bunas ed efficientas colliaziuns da via e viafier ina rait digitala sperta ed efficienta en tut il chantun. Plinavon accentuescha ella la muntada da purschidas da scolaziun decentralas en tut las linguas chantunales. Sco represchentanta da la Bregaglia cun in'auta quota da produziun idraulica vul *Giacometti* era s'engaschar per in'indemnisaziun commensurada da la forza idraulica che sappia er esser la basa per ina cooperaziun durabla tranter las regiuns muntagnardas ed ils centers urbans. L'interpretider e chasarin *Martin Bundi* vul daventar cusseglie nazional perquai ch'ils manaschis pitschens e mesans sajan sutrepreschentads en il parlament. Sco interpretider e patrun vegnessia el er a s'engaschar per meglierar las cundiziuns da rom per l'economia en las regiuns muntagnardas. *Bundi* pledescha per dapli innovaziun e main burocracia e s'engaschar dapli a favur da la promozion dal sport e da la cultura.